

Monumentonan cla pa sigui fungi na beneficio di Aruba

ORANJESTAD – Ya ta mas cu un luna cu contratista a entrega e trabou y mientras tanto, gobierno ta percurando pa ultimo detayenan, prome cu pone bek den funcion. Director di Monumentenbureau Yvonne Webb a bisa: Restauracion di e edificio di ex Havenmeesterkantoor riba L.G. Smith Boulevard ta un proyecto chikito cu a keda cla, pero di balor hopi grandi.

Ademas di ta ubica den un pida tereno di balor enorme dilanti di waf, den centro di ciudad y riba un di e camindanan cu mas transito riba nos isla, e edificio chikito di dos piso tin un luga importante den e historia y desaroyo economico di Aruba, sra. Webb a splica. “Bo por wak su balor mescos cu si bo tin un toren na aeropuerto pa e avionnan drenta, den historia esaki tabata e toren cu ta wak ora e barconan drenta waf”. Den transcurso di tempo, e edificio tabata oficina di Aruba Tourism Authority y di e Ministerio, sra Webb a duna di conoce.

Historia di construccion

Como cu e ta construi na 1940, esey ta determina hopi su estilo. Su dak, por ehempel, ta traha di shingles, loke a pone hopi haci e pregunta na Monumentenbureau, pakico no a uza panchi. E motibo ta precisamente e autenticidad historico. E edificio a wordo traha den tempo di guerra, momento cu hopi material di construccion no tabata yega Aruba, sra. Webb a bisa.

E tempo ey material tabata bin di Merca. Havenmeesterkantoor, mescos cu Bestuurskantoor, ta traha cu dak di shingles y no di panchi manera si ta e caso cu edificio di Zoutmanstraat, net patras y cu ta hopi mas bieu. “Si bo bay cambia esey y pone di panchi, bo ta falsifica historia di arkitektura”, sra. Webb a indica.

Financiamiento

Su restauracion a wordo financiancia dor di Fundacion Desaroyo Aruba, FDA y e arkitekto encarga tabata e hoben Arubiano sr. Serge Thijzen. “El a haci su prome restauracion y el a haci su investigacion di e trabou den colaboracion cu Monumentenbureau”, sra. Webb a comenta. E contratista tabata ALBO Aruba N.V. cu a entrega e trabou na inicio di juli. Actualmente Gobierno ta preparando pa Minister di Infraestructura muda su personal eyden. Ta trata di e miembronan di InfraTeam y e ekipo di consehero di DIMAS.

Reconstruccion

Monumentenbureau y ing. Thijzen a diseña e interior di e edificio pa sirbi como espacio pa oficina. E reto di mas grandi den e proyecto aki tabata atrobe, segun Sra. Webb, ta e reconstruccion segun su diseño original. Un di nan tabata e balcon na e skina banda panort. Tambe tabata asuntunan di midimento di haltura y aspecto di awa y su efecto riba e estabilidad di e edificio. Otro reto tabata e bentana cu mester a wordo construi dos bialha pa



nan por a keda perfecto, segun sra. Webb.

Caracteristicanan mas moderno y funcional di e edificio di Havenstraat ta un sistema di aircu cu ta detecta e cantidad di persona den sala pa asina e funciona mas of menos halto, segun cu ta necesario, loke ta spaar energia. Mescos por bisa di e luznan. Nan ta paga automaticamente ora bo sali di e oficina. “Tin varios aspecto “green” tambe cu nos a tuma den consideracion pa e diseño di e edificio aki”, sra. Webb a comenta.

Monumentonan

Havenmeesterkantoor ta un di e 33 monumentonan historico cu Gobierno di Aruba tin registra pa nan proteccion. E edificio ta un parti di e Plasa Monumental cu ta construyendo pa bira un atraccion historico pa turismo y un punto di encuentro social pa nos comunidad.

Den dje ta inclui Oficina di Gobierno, Parlamento, Gabinete di Gobernador, Willem III Toren y Museo Historico, Stadhuis, Contraloria General y Zoutmanstraat (ex Museo Numismatico) conecta memey pa Plasa Padu den contraste cu e modernismo di edificio Cocolishi.

Monumento ex Museo Numismatico restaura

Sr. Joel Croes, hoben Arubiano den arkitektura a haya encargo pa forma parti huntu cu Monumentenbureau di e ekipo respon-

sabel pa rescata y restaura un di e joyanan monumental di nos pais. Den e caso aki ta e edificio di ex Museo Numismatico situa na punta di Zoutmanstraat. E proyecto a nifica un reto profesional y un satisfaccion personal pa e arkitekto di CAST N.V.

“Dia nos a cuminsa cu e proyecto aki e no tabata muestra asina complica te ora cu a cuminsa cu e investigacion di e caracter monumental di e edificio”. Nos a haya sorpresa durante e diseño pero tambe durante e construccion, esey, den e mundo di monumento ta algo normal, segun sr. Croes. Bo mester busca e historia y originalidad, sr. Croes a agrega. A base di e esfuersonan ey a haci mapanan adicional cu detayenan extra pa asina por a cumpli cu e elementonan final cu ta importante pa e edificio.

E arkitekto, kende tambe ta encarga cu diseño di edificio di MFA na Paradera, ta sinti su mes satisfecho cu e resultado. “Cu contribucion di Monumentenbureau nos ta hopi contento di e decisionnan cu nos a tuma na final pa nos respeta e edificio y mantene su caracter monumental y caracteristica”, el a bisa.

Comunicacion

Hunto cu oficina di Monumento, e tabata sostiene reunion tur siman cu e contratista y un reunion grandi un bes pa luna. E cinco reunionnan mensual aki a percura pa

un bon comunicacion. “Ora bo tuma decision a base di investigacion tur hende mester ta riba e mesun liña” sr. Croes a indica remarcando cu planificacion a bay hopi bon. Durante ehecuccion tambe a mantene contacto sea topando na e sitio di construccion of via telefon pa evita of aklaria mal comprendemento. “Manera un ekipo nos a traha pa yega e meta final y nos ta logrando esaki”, sr. Croes a bisa.

Oportunidad

“Forma parti di e vision di Gabinete Mike Eman pa rescata e monumentonan historico for di abandono pa trece nan bek den status di joya arkitectonico, ta un placer y un experiencia hopi fructifero pa mi”, e arkitekto hoben a expresa. “Nos ta haya hopi great cu nos por a forma parti di e ekipo di monumento cu e sosten di Monumentenbureau y su cantidad di informacion y conocimiento”, sr. Croes a comenta.

Tambe sr. Croes a señala e beneficio pa nos como pais indicando cu: “No ta tur dia bo ta renoba un edificio historico na Aruba. Aruba no conoce asina hopi edificio manera, por ehempel nos isla ruman Corsou. P’esey nos kier purba conserva e cantidad di monumentonan cu nos tin cu ta un parti di nos historia. Pa mi e ta un honor pa forma parti di esaki, di e restauracion di e edificio aki”, sr. Croes a finalisa. □

